

**Homélie prononcée par l'abbé Henri Murith,  
lors de la messe télévisée à l'occasion de la fête de la Poya,  
à Estavannens, le 14 mai 2000**

Mon Chinyà.

E vo ti lè j'èmi diviyè kothemè d'intye no, vo ti dzin de la vela è dzin de la têra, vi j'ithè vinyè chti matin du ti lè kâro dou payi inke pri de la tzapala dou Dò à Ethavanin, po fithâ avui lè j'armayi le gran momin de la Poya, ha montâye dou tropi du lè prâ dou Bâ, vê lè patheria de lé d'amon, yô dzin è bithè van pachâ le tzôtin.

N'è pâ rin tyè po kontinuâ na bala kothema ke vo j'ithè vinyè inke amon. L'e pe hyâ po rè trovâ lè rachenè du yô no chin chayê, di rachenè ke bayon adi ha chêva ke no fâ vivre ou dzoa d'ora. Hou rachenè tiron lou chêva dou kâ de nouthrè j'anhyan ke chon jou nurè de la parola de Dyu è de chon pan de ya. Houj'omo, hou donnè ke l'an trimâ, le pye chovin din la pourètâ, ke chè chon amâ è ke l'an mâ le bon Dyu, ke n'an pâ koru apri lè gloriolè d'inke bâ, ma ke l'an martyi din le rêchpè de la ntura è la fidélita ou Mètre de la ya, lè hà ke l'an bâti chi payi yô li fâ bon vivre, avui chè krê le lon di tzemin, chè tzapalè è chè mothi, chunyo de la fê è de l'échpéranthe k'abitâvan lou kâ.

Hou brâvè dzin akutâvan le Bon Fyè de l'évanjilo è chavan chè léchi adreyi avui konfianthe, chu lè tzemin ke van in amon vê la méjon dou chènya. Hou tzemin chin dyémé fachilo ma in chè léchin menâ pè le bon Fayè on vin à kou de totè lè difikultâ on chè léchè pâ ékraja pè lè j'épravè, ou kontréro, on in fâ on moyin po rindre pye cholida cha fidélitâ.

Chink'irè veré on yâdzo, lè onkora veré ou dzoa d'ora. On li moujè pâ prâ. I chimbyè kotyè kou ke to lè tzandyi. Lè kothemè k'on krèyè churè po de bon, chon oubyâyè è rimpyathè pè di moudè. On chè demandè yô to chin va no menâ. N'in da prâ ké abandonon le tropi po chè léchi dzubya vê lè tzemin de la fachilitâ in krèyin ke l'èrdzin lou j'apouârtèrè le bouneu.

I abyon ke le Bon Dyu l'è adi todoulon inke to pri po no chotinyi è no devejâ ou fon dou kâ. Fô prendre la pèna de l'akutâ, de chièdre chin ke no di è de prêyi de to chon kâ. E pu, li a kôkon ke mothrè le bon tzemin :

L'è nouthron pape Dyan Pol II, nouthrè j'évètyè ke kontinon de menâ le tropi ou non dou chol Bon Fayè k'è Jésus Kri. Li no j'invouyè che n'échpri Chin ke no chohyiè à l'oroye chin ke fô moujâ, chin ke fô fére po choabrâ din chen'amihyâ, por alèvâ lè j'infan din le drê tzemin, po chuporta lè j'épravè de la ya in chè kranpounin à chi ke l'a porta cha krê de van no tantyè à la réjurekchion.

In chti dzoa de la fitha di donnè, i kouâjo à totè lè donnè de trovâ ou fon de lou ka tota l'amihyâ ke fô po réléchi à lou j'infan la lumière è le korâdzo po vivre din le dzouyo è l'échpéranthe din chti mondo tan diffichilo à vivre.

I rêmarhyo lè donnè d'on yâdzo è ha de ouê (chin j'oubyâ lè j'omo,) po to le bin ke fan è ke faran adi po bâti on mondo meyâ. Avui là, no réderin chovin ha bala prèyire de l'abbé Bovet : "A nouthra Donna di Mârtzè":

« Vinidè no j'idyi, no j'in d'an rido fôta po fére tot'èvi bin adrê chin ke fô »

E nouthra donna no répon :

« Fédè to chin ke vo derè mon fe. »

Chin ke no di chon FE ?

« Amâdè vo lè j'on lè j'ôtro kemin i vo j'é amâ »

E po chi tin dou Jubilé :

« Perdenâde à hou ke vo j'an fê dou touâ, amâdè mimamin vouthrè j'ènnemi. »

Lè dè chta manière ke no porin réchimbyâ ôtiè mé à nouthron Chènya pyin dè mijérikouârda. Mè jêmi, chta né, kan vo rétouârnèrè intye vo, prindè na pitita vouêrbeta po rémoujâ à chin ke vo j'é véku chti matin inke pri dè la tzapaleta dou DÀ.

Adon avui on kà rénovalà, vo rèprindrè to kontin, letzemin ke montè tantyè ou gran Patherià yô vo j'atin le Bon FayYê avui cha Donna, nouthra Donna, et ti lè Chin.

Amen.